

唐書合鈔

唐書卷第十六

本紀十六

穆宗

穆宗睿聖文惠孝皇帝諱恒憲宗第三子母曰懿安皇后郭氏貞元十一年七月生於大明宮之別殿初名宥封建安郡王元和元年八月進封遂王五年三月領彰

義軍節度大使七年十月冊爲皇太子改今諱

元和七年惠昭

太子薨左神策軍中尉吐突承璀欲立澧王憚而憚母賤不當立乃立遂王爲皇太子

十五年正

月庚子憲宗崩

司空兼中書令韓宏攝冢宰陳宏志殺吐突承璀及澧王

閏月丙午

卽皇帝位於太極殿東序是日詔翰林學士段文昌杜元穎沈傳師李肇侍讀薛放丁公著對於思政殿並賜

金紫丁未集羣臣班於月華門外貶門下侍郎同平章
事皇甫鎛爲崖州司戶戊申上見宰臣於紫宸門外辛
亥以朝議郎守御史中丞飛騎尉襲徐國公賜緋魚袋
蕭俛爲朝散大夫守中書舍人翰林學士武騎尉賜紫
金魚袋段文昌爲中書侍郎並同中書門下平章事

表令

狐楚爲門下侍郎

上始御延英對宰臣詔曰山人柳泌輕懷左

道上惑先朝固求牧人貴欲疑衆白知虛誕仍更遁逃
僧大通醫方不精藥術皆妄旣延禍釁俱是姦邪邦國
固有常刑人神所宜共棄付京兆府決杖處死金吾將
軍李道古貶循州司馬憲宗末年銳於服餌皇甫鎛與

李道古薦術人柳泌僧大通待詔翰林泌於台州爲上
鍊神丹上服之日加躁渴遽棄萬國甲寅二王後介國
公宇文仲達卒有司舉舊典葬祭之以監察御史李德
裕右拾遺李紳禮部員外郎庾敬休並守本官充翰林
學士丁巳以劍南東川節度使李逢吉爲襄州刺史山
南東道節度使以吏部侍郎王涯檢校禮部尙書梓州
刺史劍南東川節度使已未改恒岳爲鎮岳恒州爲鎮
州定州恒陽縣爲曲陽縣恒王房子孫改爲泚王房丙
寅以右神策大將軍張惟清爲單于大都護振武麟勝
節度使丁卯上及羣臣皆釋服從吉戊辰羣臣始朝於

宣政衙是夜地震庚午冊大行皇帝貴妃郭氏爲皇太

后新書乙卯貶諫議大夫李景儉爲建州刺史二月癸酉朔

丁丑御丹鳳樓大赦天下賜文武官階爵高年粟帛二王後三恪文宣公嗣王公主

縣主武德配享及第一等功臣家子一子官放沒掖庭者宣制畢陳俳優百戲於丹

鳳門內上縱觀之丁亥幸左神策軍觀角觝及雜戲日

昃而罷癸巳罷邕管經畧使所管州縣隸邕府甲午以

桂管觀察使裴行立爲安南都護本管經畧使乙未太

僕卿杜式方爲桂州刺史桂管觀察使吐蕃寇靈州丙申丹

王逾薨丁酉敕入迴鶻使宜與私覲正員官十三員入

吐蕃使與八員庚子太子賓客呂元膺卒辛丑以戶部

侍郎楊於陵爲戶部尚書壬寅敕舉賢良方正直言極
諫等科目人宜令中書門下尚書省四品已上於尚書
省同試三月癸卯朔贈皇太后父郭曖太傅母虢國大
長公主贈齊國大長公主

乙巳杜叔良及吐蕃戰敗之

壬子召侍講

學士韋處厚路隨於太液亭講毛詩關雎尚書洪範等
篇旣罷並賜緋魚袋左右軍中尉馬進潭梁守謙魏宏
簡等請立門戟從之以太子詹事分司東都韋貫之爲
河南尹丁巳御史中丞崔植奏元和十二年敕御史臺
三院御史據除拜上日爲先後未上日不得計月數又
準其年九月十七日敕踰一箇月不在此限行立班次

卽宜以敕內先後爲定臣觀此後敕未便事宜請自今後三院御史職事行立一切依敕文先後爲定除拜上日便爲月數從之戊午吏部尙書趙宗儒奏先奉敕先朝所放制科舉人令與中書門下四品已上官同於尙書省就試者臣伏以制科所設本在親臨南省策試亦非舊典今覃恩旣畢庶政惟新況山陵日近公務繁迫待問之士就試非多臣等商量恐須停罷從之罷申州歲貢茶乙丑以皇太后兄司農卿郭釗爲刑部尙書兼司農卿右金吾大將軍郭鏐檢校工部尙書丁卯貶太子賓客留司東都孟簡爲吉州員外司馬戊辰夜大風

電夏四月壬申朔丁丑禮王惲薨乙酉三恪鄴國公楊
造卒丁亥敕內侍省見管高品官白身都四千六百一
十八人除官員一千六百九十六人外其餘單貧無屋
室居止宜每人加衣糧半分五月壬寅朔癸卯詔以國
用不足應天下兩稅鹽利權酒稅茶及戶部闕官除陌
等錢兼諸道雜權稅等應合送上都及留州留使諸道
支用諸司使職掌人課料等錢並每貫除舊墊陌外量
抽五十文仍委本道本司本使據數逐季收計其諸道
錢便差綱部送付度支收管待國用稍充卽依舊制其
京百司俸料文官已抽修國學不可重有抽取武官所

給校薄亦不在抽取之限壬子詔入景陵元宮合供千
味食魚肉肥鮮恐致薰穢宜令尙藥局以香藥代食庚
申葬憲宗於景陵六月辛未朔丁丑以司徒兼中書令
韓宏爲河中尹河中晉絳慈隰節度使安南都護桂仲
武奏誅賊首楊清收復安南府新書在三
月辛未戊寅以金吾
將軍李祐檢校左散騎常侍兼夏州刺史夏綏銀宥節
度使代李聽以聽爲靈州長史朔方靈鹽節度使以中
書舍人王仲舒爲洪州刺史御史中丞江西觀察使已
卯放京兆府今年夏稅青苗錢八萬三千五百六十貫
宜委令狐楚以楚山陵用不盡綾絹準實估付京兆府

代所放青苗錢庚辰加邢寧慶節度使李光顏特進以
城鹽州之功也以考功員外郎史館修撰李翱爲朗州
刺史坐與李景儉相善故也癸未併兗州萊蕪縣入乾
封縣己丑工部尙書歸登卒壬辰詔帝王所重者國體
所切者人情苟得其體必臻於大和如失其情是曲於
小利況設官求理頒祿責功教既有常寧宜就減近以
每歲經費量入數少外官俸料據數收貫朕再三思度
終所未安今則歲屬豐登兵方偃息自宜克己以足用
何得剝下以爲謀臨軒載懷實所增愧其今年五月敕
應給用錢每貫抽五十文都計一百五十萬貫宜併停

抽仍出內庫錢三十七萬五千貫付度支給用初憲宗
用兵擢皇甫鎛爲相苛斂剝下人皆咎之以至譴逐至
是宰臣創抽貫之利制下人情不悅故罷之癸巳皇太
后移居興慶宮皇帝與六宮侍從大合宴於南內迴幸
右軍頒賜中尉等有差自是凡三日一幸左右軍及御
晨暉九仙等門觀角觝雜戲秋七月辛丑朔壬寅以河
中晉絳觀察使李絳爲兵部尙書甲辰以大理卿孔戢
爲潭州刺史湖南觀察使乙巳詔皇太后就安長樂朝
夕承顏慈訓所加慶感兼極今月六日是朕載誕之辰
奉迎皇太后於宮中上壽朕旣深歡慰欲與臣下同之

其日百僚命婦宜於光順門進名叅賀朕於光順門內
殿與百僚相見永爲常式非典也鄆曹濮節度賜號天
平軍從馬總奏也丙午敕乙巳詔書載誕受賀儀宜停
先是左丞韋綬奏行之宰臣以古無降誕受賀之禮奏
罷之丁未苑內假山毀壓死役者七人自五月不雨至
壬子始雨甲寅御新成永安殿觀百戲極歡而罷乙卯
敕自今後新除節度觀察使到任日具見在錢帛斛斗
器械數目分析以聞安南都護裴行立卒是日上幸安
國寺觀孟蘭盆容管經畧使楊旻卒平盧軍新加押新
羅渤海兩蕃使賜印一面許置巡官一人新作寶慶殿

庚申夜熒惑入羽林壬戌盛飾安國慈恩千福開業章
敬等寺縱吐蕃使者觀之丙寅以新成永安殿與中宮
貴主密宴以樂之嬪妃皆預丁卯以門下侍郎同平章
事令狐楚爲宣州刺史兼御史大夫宣歙池觀察使楚
爲山陵使縱吏于輦刻下不給工徒價錢積留錢十五
萬貫爲羨餘以獻故及於貶八月庚午朔辛未兵部尙
書楊於陵總百僚錢貨輕重之議取天下兩稅權酒鹽
利等悉以布帛任土所產物充稅並不徵見錢則物漸
重錢漸輕農人見免賤賣匹段請中書門下御史臺諸
司官長重議施行從之癸酉太子少傅致仕李鄴卒甲

戊安南都護桂仲武斬叛將楊清首以獻收復安南府

案此條已見六月丁丑疑重出乙亥賜教坊錢五千貫充息利本錢御

勤政樓問人疾苦前江西觀察使裴次元卒已卯月掩

牽牛同州雨雪害秋稼京兆府戶曹參軍韋正牧專知

景陵工作刻削厨料充私用計贓八千七百貫文石作

專知官奉先縣令于翬刻削計贓一萬三千貫並宜決

重杖處死

乙酉容管經畧留後嚴公素及黃洞蠻戰於神步敗之

壬辰幸魚藻池

發神策軍二千人浚魚藻池戊戌以朝議郎守御史中

丞武騎尉賜紫金魚袋崔植爲朝散大夫守中書侍郎

同中書門下平章事

裴蕭俛爲門下侍郎

己亥宣歙觀察使令狐

楚再貶衡州刺史九月庚子朔改河北稅鹽使爲榷鹽使辛丑大合樂於魚藻宮觀競渡又召李愬李光顏入朝欲於重陽日宴羣臣拾遺李珣等上疏諫云元朔未改園陵尙新雖易月之期俯從人欲而三年之制猶服心喪夫遇密弛禁蓋爲齊人合樂內庭事將未可不聽乙巳以駕部郎中知制誥李宗閔爲中書舍人宋州大水損田六十頃新書五行志在六月戊申以重陽節曲宴郭釗兄弟貴戚主壻等於宣和殿己酉大雨三日至是雨雪樹木無風而推仆者十五六以吏部侍郎崔羣爲御史大夫滄景水損田戊午加河東節度使金紫光祿大夫檢

校右僕射兼門下侍郎同平章事太原尹北都留守上
柱國晉國公食邑三千戶裴度守司空門下侍郎同平
章事邠寧節度使檢校司空邠州刺史上柱國武威郡
開國公食邑二千戶李光顏加同平章事以武寧軍節
度徐泗濠觀察等使檢校左僕射徐州刺史上柱國涼
國公食邑三千戶李愬同平章事潞州長史昭義軍節
度澤潞磁邢洺觀察處置使夏州奏移宥州於長澤縣
置辛酉宴李光顏李愬於麟德殿頒賜優厚以袁州刺
史韓愈爲朝散大夫守國子祭酒復賜金紫丙寅以御
史大夫崔羣檢校兵部尙書徐州刺史武寧軍節度徐

泗宿濠觀察等使以將作監崔能爲廣州刺史嶺南節
度使丁卯以兵部尙書李絳爲御史大夫戊辰以前嶺
南節度使孔綬爲吏部侍郎冬十月庚午朔閭婆國遣
使朝貢庚辰宰相與吐蕃使於中書議事京百司共賜
錢一萬貫仰御史臺據司額大小公事閒劇均之成德
軍節度使王承宗卒其弟承元上表請朝廷命帥遣起
居舍人栢耆宣慰之辛巳金公亮修成指南車記里鼓
車壬午新書吐蕃寇涇州命中尉梁守謙將神策軍四
千人及八鎮兵赴援乙酉以魏博節度使光祿大夫檢
校司徒兼侍中魏州長史上柱國沂國公食邑三千戶

實封三百戶田宏正可檢校司徒兼中書令鎮州長史
成德軍節度鎮冀深趙觀察處置等使以鎮冀深趙觀
察度支使朝議郎試金吾左衛胄曹叅軍兼監察御史
王承元可銀青光祿大夫檢校工部尙書使持節滑州
諸軍事守滑州刺史御史大夫義成軍節度鄭滑觀察
等使以昭義軍節度使檢校左僕射同平章事李愬可
本官爲魏州長史魏博節度觀察等使以義成軍節度
使劉悟依前檢校右僕射兼潞州長史昭義軍節度澤
潞邢洺磁觀察等使以左金吾將軍田布檢校左散騎
常侍兼懷州刺史御史大夫河陽三城懷孟節度使乙

西

新書
丙戌

涇州奏吐蕃退去時夏州節度使田緡貪猥侵

刻党項羌羌引西蕃入寇賴郝玘李光顏奮命拒之方

退丁亥西川奏吐蕃侵雅州令發兵鎮守東川節度使

王涯陳破吐蕃策言以厚賂北蕃俾入西蕃據地得人

多少賞之十一月己亥朔癸卯制朕聞帝王丕宅四海

子育羣生如天無不覆如日無不燭乃睠冀方初喪戎

帥念乎三軍之事泊於四州之人或懷忠積誠而思用

莫展或災荒兵役而望恤何階今則昌運一開誠節咸

著王承元首陳章疏願赴闕庭永念父兄之忠克固君

臣之義已加殊獎別委重藩又念成德軍將士等叶謀

向義丹款載申咸欲效其器能各宜列之爵秩大將史重歸牛元翼已超授寵榮今更都加厚賜宜令諫議大夫鄭覃往鎮州宣慰賜錢一百萬貫王澤所治天網方恢宥過釋寃與人休泰其管內見禁囚徒罪無輕重並宜釋放朕以武俊之勲勞光於彝鼎士真之恭恪繼被節旄承宗感恩亦克立効永言十代之宥俾賜一門之榮承宗兄弟已授官爵其承宗葬事亦差官監視務令周厚丁未封王承宗祖母李氏爲晉國太夫人辛亥田宏正奏王承元以今月九日領兵二千人赴鎮滑州成德軍徵賞錢頗急乃命栢耆先往諭之以華州刺史衛

中行爲陝州長史陝虢觀察使以宗正卿李翱

案翱是年六月

坐李景儉貶朗州不應卽遷華州也且翱傳亦無爲華州文又案李宗閔傳宗閔父翱自宗正卿出爲華州刺史計其時當在元和末此疑作李翱爲華州刺史潼關防禦鎮國軍使乙

卯上幸金吾將軍郭鏐城南莊鏐以莊爲獻戊午詔曰

朕來日暫往華清宮至暮卻還御史大夫李絳常侍崔

元畧已下伏延英門切諫上曰朕已成行不煩章疏諫

官再三論列是日田宏正奏今月十六日入鎮州訖已

未上由複道出城幸華清宮左右中尉擗仗六軍諸使

諸王駙馬千餘人從至晚還宮癸亥檢校司徒兼太子

少師鄭餘慶卒以渭州刺史涇原行營兵馬使保定郡

王郝玘爲慶州刺史玘勇將深入吐蕃接戰朝廷恐失

勇將故移之內地十二月己巳朔戊寅召故女學士朱

若華妹若昭入宮掌文奏

庚辰玘於城南

壬午幸右軍擊鞠遂

畋於城西

甲申玘於苑北

丙戌前昭義軍節度使辛祕卒己丑

以庫部郎中知制誥牛僧孺爲御史中丞嶺南奏崖州

司戶叅軍皇甫鏞卒丙申以司門員外郎白居易爲主

客郎中知制誥是歲計戶帳戶總二百三十七萬五千

四百口總一千五百七十六萬定鹽夏劍南東西川嶺

南黔中邕管容管安南合九十七州不申戶帳

長慶元年春正月己亥朔上親薦獻太清宮太廟是日

法駕赴南郊日抱珥宰臣賀於前殿

己亥朝獻於太清宮庚子朝享於太

廟

辛丑祀昊天上帝於圓丘卽日還宮御丹鳳樓大赦

天下改元長慶內外文武及致仕官三品已上賜爵一級四品已下加一階陪位白身人賜勲兩轉應緣大禮移仗宿衛御樓兵仗將士普恩之外賜勲爵有差仍準舊例賜錢物二十萬四千九百六十端匹禮畢羣臣於樓前稱賀仗退上朝太后於興慶宮壬寅夏州節度使奏浙東湖南等道防秋兵不習邊事請留其兵甲歸其人靈武節度使李聽奏請於淮南忠武武寧等道防秋兵中取三千人衣賜月糧賜當道自召募一千五百人

馬驍勇者以備邊仍令五十人爲一社每一馬死社人共補之馬永無闕從之癸卯以河陽三城節度使田布爲涇州刺史四鎮北庭行營涇原節度使以刑部尙書兼司農卿郭釗檢校戶部尙書懷州刺史河陽三城懷孟節度使以涇原節度使王潛檢校兵部尙書江陵尹荆南節度使乙巳鄜坊節度使韓瑊改名充己酉以前檢校大理少卿駙馬都尉劉士涇爲太僕卿給事中韋宏景薛存慶封還詔書上諭之曰士涇父昌有邊功久爲少列十餘年又以尙雲安公主朕欲加恩制官敕下制命始行翰林學士司勳員外郎李德裕上疏曰臣見

國朝故事駙馬國之親密不合與朝廷要官相往來開
元中禁止尤切近日駙馬多至宰相及要官宅此輩無
他才可以延接唯是漏洩禁密交通中外伏望宣示駙
馬等今後有事任至中書見宰臣此外不得至宰臣及
臺省官私第從之戊午新書夜星孛於翼壬戌制朝議
大夫守門下侍郎同平章事徐國公蕭俛爲右僕射累
表乞罷政事故也癸亥以左散騎常侍崔元畧爲黔州
刺史黔中觀察使丁卯星孛於辰近太微西垣南第一
星二月戊辰朔癸酉以右僕射蕭俛爲吏部尙書甲戌
以檢校右僕射兼吏部尙書韓臯守右僕射乙亥夜太

白犯昂丙子上觀雜伎樂於麟德殿歡甚顧謂給事中
丁公著曰比聞外間公卿士庶時爲歡宴蓋時和民安
甚慰予心公著對曰誠有此事然臣之愚見風俗如此
亦不足嘉百司庶務漸恐勞煩聖慮上曰何至於是對
曰夫賓宴之禮務達誠敬不繼以淫故詩人美樂且有
儀憐異二字屢舞前代名士良辰宴聚或清談賦詩投

壺雅歌以杯酌獻酬不至於亂國家自天寶已後風俗
奢靡宴席以諠譁沈湎爲樂而居重位秉大權者優雜
倨肆於公吏之間曾無媿恥公私相效漸以成俗由是
物務多廢獨聖心求理安得不勞宸慮乎陛下宜頒訓

令禁其過差則天下幸甚時上荒於酒樂公著因對諷之頗深嘉納已卯幽州節度使劉總奏請去位落髮爲僧又請分割幽州所管郡縣爲三道請支三軍賞設錢一百萬貫壬午以中書侍郎同平章事段文昌檢校刑部尙書同平章事成都尹劍南西川節度使以朝散大夫戶部侍郎知制誥翰林學士上柱國建安縣開國男杜元穎守本官同中書門下平章事以劍南西川節度使王播爲刑部尙書充鹽鐵轉運使乙酉天平軍節度使馬總奏當道見管軍士三萬三千五百人從去年正月已後情願居農者放逃亡者不捕先是平定河南及

王承元去鎮州宰臣蕭俛等不顧遠圖乃獻銷兵之議
請密詔天下軍鎮每年限百人內破八人逃死故總有
是奏丁亥夜月犯歲星在尾十三度辛卯寒食節宴羣
臣於麟德殿頒賜有差壬辰刑部侍郎李建卒癸巳九
姓回鶻毗伽保義可汗卒三月丁酉朔浙東奏移明州
於鄞縣置劉總進馬一萬五千匹甲辰鄭滑節度使王
承元祖母晉國太夫人李氏來朝既見上令朝太后於
南內丁未宗正寺奏準貞元二十一年敕宗子陪位放
五百七十人出身準今年敕放三百人伏緣人數至多
不霑恩澤乞降特恩更放二百人出身從之平盧薛平

奏海賊掠賣新羅人口於緣海郡縣請嚴加禁絕俾異俗懷恩從之戊申罷京西京北和糴使擾人故也罷河

北榷鹽法許約計課利都數付榷鹽院庚戌以尚書左

丞韋綬爲禮部尚書

太白晝見

是夜太白近五車辛亥命給

事中薛存慶充幽州宣慰使左拾遺狄兼謩副之鹽鐵

使王播奏江淮鹽估每斗加五十文兼舊二百文癸丑

以幽州盧龍軍節度副大使知節度事押奚契丹兩蕃

經畧等使檢校司空同平章事楚國公劉總檢校司徒

兼侍中天平軍節度鄆曹濮觀察等使以宣武軍節度

使檢校右僕射同平章事張宏靖檢校司空同平章事

兼幽州長史幽州盧龍軍節度使從劉總所奏也以鳳
翔節度使李愿檢校司空汴州刺史宣武軍節度使以
邢寧節度使李光顏爲鳳翔尹依前檢校司空同平章
事鳳翔隴右節度使以右衛大將軍高霞寓檢校工部
尚書邢州刺史邢寧節度使諫官上疏論霞寓敗軍左
謫未宜拜方鎮不從乙卯以權知京兆尹盧士攻爲瀛
州刺史瀛莫都團練觀察使從劉總奏析置也丁巳制
劉總已極上台仍移重鎮兄弟子姪各授官榮大將兵
僚亦宜超擢幽州百姓給復一年賜三軍賞設錢一百
萬貫令宣慰使薛存慶與宏靖計會支給戊午封皇弟

景爲鄜王悅爲瓊王恂爲沔王懌爲婺王悊爲茂王怡
爲光王協爲淄王憺爲衢王忱爲澶王皇子湛爲景王
涵爲江王湊爲漳王溶爲安王瀍爲潁王以兵部侍郎
柳公綽爲京兆尹兼御史大夫已未以屯田員外郎李
德裕爲考功郎中左補闕李紳爲司勳員外郎並依前
知制誥翰林學士敕今年錢徽下進士及第鄭朗等一
十四人宜令中書舍人王起主客郎中知制誥白居易
等重試以聞甲子劉總請以私第爲佛寺乃遣中使賜
寺額曰報恩幽州奏劉總堅請爲僧又賜以僧衣賜號
大覺總是夜遁去幽州人不知所之乙丑以漳州刺史

韓泰爲郴州刺史汀州刺史韓曄爲永州刺史循州刺史陳諫爲道州刺史量移也夏四月丙寅朔授劉總弟約及總男等一十一人官內五人爲刺史餘朝班環衛庚午易定奏劉總已爲僧三月二十七日卒於當道界贈太尉甲戌祕書監蔣乂卒丙子以前天平軍節度使馬總復爲天平軍節度使丁丑詔國家設文學之科本求才實苟容僥倖則異至公訪聞近日浮薄之徒扇爲朋黨謂之關節干擾主司每歲策名無不先定永言敗俗深用興懷鄭朗等昨令重試意在精覈藝能不於異常之中固求深僻題目貴令所試成就以觀學藝淺深

孤竹管是祭天之樂出於周禮正經閱其呈試之文都
不知其本事辭律鄙淺蕪累何多亦令宣示錢徽庶其
深自懷媿誠宜盡棄以警將來但以四海無虞人心方
泰用宏寬假式示殊恩孔溫業趙存約竇洵直所試粗
通與及第盧公亮等十一人可落下自今後禮部舉人
宜準開元二十五年敕及第人所試雜文并策送中書
門下詳覆貶禮部侍郎錢徽爲江州刺史中書舍人李
宗閔爲劍州刺史右補闕楊汝士爲開州開江令戊寅
宰臣崔植杜元穎奏請坐日所有君臣獻替事關理體
便隨日撰錄號爲聖政紀歲終付史館從之事亦不行

丙戌正衙命使冊九姓迴鶻爲登羅羽錄沒密施句主
錄毗伽可汗辛卯以衡州刺史令狐楚爲郢州刺史吉州
司馬孟簡爲睦州刺史壬辰詔百辟卿士宜各徇公勿
爲朋黨甲午以張宏靖入幽州受朝賀中書門下奏燕
薊八州平準禮宜告陵廟從之五月丙申朔戊戌以刑
獄淹滯立程凡大事大理寺三十五日詳斷訖申刑部
三十日聞奏中事大理寺三十日刑部二十五日小事
大理寺二十五日刑部二十日所斷罪二十件已上爲
大十件已上爲中十件已下爲小刑部四覆官大理六
丞每月常須二十日入省寺其廚料令戶部加給從御

史中丞牛僧孺奏也已亥貶考功員外郎李渤爲虔州
刺史以前書宰相考辭太過宰相杜元穎等奏貶之癸
卯幽州大將李叅已下十八人並爲刺史及諸衛將軍
已酉右散騎常侍致仕柳登卒辛亥造百尺樓於宮中
壬子加茶權舊額百文更加五十文從王播奏拾遺李
珣上疏論其不可疏奏不報丙辰建王審當作格薨丁巳
滄州先置景州於弓高縣置歸化縣於福壽草市並宜
停廢壬戌幽州宣慰使給事中薛存慶卒於鎮州癸亥
敕先置澠州於鄆城宜廢其鄆城上蔡西平遂平兩縣
復隸蔡州皇妹太和公主出降迴鶻登羅骨沒密施合

毗伽可汗甲子命金吾大將軍胡証充送公主入迴鶻

使兼冊可汗又以太府卿李銳爲入迴鶻婚禮使六月

乙丑朔

有星孛出于昴
天文志無

辛未吐蕃犯青塞堡

鹽州刺史李文悅敗

之甲申賜御史中丞牛僧孺金紫秋七月乙未朔壬寅

月掩房次相

甲辰幽州盧龍軍都知兵馬使朱克融囚其節度使張宏靖以反

壬子羣

臣上尊號曰文武孝德皇帝是日上受冊於宣政殿禮

畢御丹鳳樓大赦天下

賜文武官階勳爵

甲寅幽州監軍使奏

今月十日軍亂囚節度使張宏靖別館害判官韋雍張

宗元崔仲卿鄭墳軍人取朱滔子洄爲留後丁巳貶張

宏靖爲太子賓客分司己未再貶宏靖爲吉州刺史朱

洄自以年老令軍人立其子克融爲留後初劉總歸朝籍其軍中素難制者送歸闕庭克融在籍中宰相崔植杜元穎素不知兵心無遠慮謂兩河無虞不復禍亂矣遂奏劉總所籍大將並勒還幽州故克融爲亂復失河北庚申以昭義軍節度使劉悟檢校司空兼幽州長史幽州盧龍軍節度副大使知節度事以國子祭酒韓愈爲兵部侍郎辛酉太和公主發赴迴鶻上以半仗御通化門臨送羣臣班於章敬寺前壬戌成德軍大將王庭湊殺其節度使田宏正以八月甲子朔己巳鎮州監軍使宋惟澄奏七月二十八日夜軍亂節度使田宏正并家屬將佐三百餘口並

遇害軍人推衛將王廷湊爲留後辛未以左金吾將軍

楊元卿爲涇州刺史四鎮北庭行軍涇原節度使敕公

卿大臣至中書議幽鎮討伐之謀壬申朱克融陷莫州癸酉王廷

湊遣盜殺冀州刺史王進岌據其郡乙亥以前涇原節

度使田布起復檢校工部尙書兼魏州長史魏博節度

使丙子王庭湊寇深州丁丑魏博橫已卯以深州刺史

本州團練使牛元翼充深冀節度使辛巳夜太白近軒

轅左角冀州刺史吳晔潛爲幽州兵所逐瀛州兵亂囚

觀察使盧士玫瀛州尋爲幽州兵所據新書已丑以河

東節度使裴度充幽鎮兩道招撫使庚寅以建州刺史

李景儉爲諫議大夫壬辰夜太白近太微西垣癸巳鎮
州出兵圍深州九月甲午朔丁酉廢興州鳴水縣戊戌
夜太白近太微右執法壬寅大雨震霆乙巳相州兵亂
殺刺史邢漣丙午令內常侍段文政監領鄭滑河東許
三道兵救援深州吐蕃請盟許之辛亥夜月近天關壬
子幽州賊掠易州涑水遂城滿城癸丑以前魏博節度
使李愬爲太子少保癸亥魏博節度使田布奏出師五
千赴貝州行營冬十月甲子朔丙寅太中大夫守刑部
尚書騎都尉王播可中書侍郎同中書門下平章事依
前充鹽鐵轉運使以河東節度使裴度充鎮州四面行

營都招討使以左領軍衛大將軍杜叔良充深冀諸道
行營節度使戊辰以深冀節度使牛元翼爲鎮州長史
成德軍節度鎮冀深趙節度使辛未以中書舍人知貢
舉王起爲禮部侍郎兵部郎中楊嗣復爲庫部郎中知
制誥壬申以東都留守鄭絪爲吏部尙書以吏部尙書
李絳檢校右僕射判東都尙書省事東都留守都畿防
禦使以工部尙書丁公著檢校左散騎常侍兼越州刺
史御史中丞浙東觀察使乙亥沂州刺史王智興爲武
寧軍節度副使丁丑裴度奏自將兵取故關路進討朱
克融兵寇蔚州戊寅王廷湊兵寇貝州易州刺史柳公

濟奏於白石嶺破燕軍三千

庚辰

滄州烏重胤奏於饒陽

破賊工部尚書韋貫之卒

辛巳靈武節度使李進誠及吐蕃戰於大石山敗之王

午以主客郎中知制誥白居易爲中書舍人河東節度使裴度三上章論翰林學士元稹與中官知樞密魏宏簡交通傾亂朝政以稹爲工部侍郎罷學士宏簡爲弓箭庫使甲申以京兆尹御史大夫柳公綽爲吏部侍郎丙戌以深冀行營節度使杜叔良爲滄州刺史橫海軍節度使以代烏重胤授重胤檢校司徒興元尹山南西道節度使時上急於誅賊杜叔良出征日面辭奏云臣必旦夕破賊重胤善將知兵以賊勢未可卒平用兵稍

緩故有是拜丁亥前浙東觀察使薛戎卒戊子魏博田
布奏自率全師進討太子少保李愬卒己丑以戶部侍
郎判度支崔俊爲工部尙書判度支以山南西道節度
使崔從爲尙書左丞以祕書監許季同爲華州刺史潼
關防禦鎮國軍使辛卯昭義劉悟奏自將兵次臨城十
一月甲午朔裴度奏破賊於會星鎮丙申朱克融兵大寇
定州節度使陳楚出師拒戰破賊二萬乙巳徐州崔羣
奏遣節度副使王智興率師赴行營戊申以司農卿裴
武爲鎮州行營供軍使戊午上御宣政殿試制科舉人
辛酉淄青牙將馬延崙謀逆節度使薛平覺其謀而誅

之詔中書舍人白居易膳部郎中陳岵考功員外郎賈
餗同考制策十二月甲子朔丙寅以前容管經畧留後
嚴公素爲容州刺史容管經畧使丁卯貶諫議大夫李
景儉爲楚州刺史庚午杜叔良之軍與賊戰於博野爲
賊所敗七千人陷賊叔良僅免乙亥敕諸道除上供外
留州留使錢內每貫割二百文以助軍用賊平後仍舊
丁丑定州陳楚破朱克融賊二萬於望都戊寅以鳳翔節
度使李光顏爲忠武軍節度使代李遜仍兼深冀行營
節度使以李遜爲鳳翔尹鳳翔隴右節度使貶員外郎
獨孤朗韶州刺史起居舍人溫造朗州刺史司勳員外

郎李肇澧州刺史刑部員外郎王鎰郢州刺史坐與李
景儉於史館同飲景儉乘醉見宰相謾罵故也兵部郎
中知制誥馮宿庫部郎中知制誥楊嗣復各罰一季俸
料亦坐與景儉同飲然先起不貶官辛巳李光顏赴鎮
百僚餞於章敬寺上御通化門臨送賜玉帶名馬仍敕
神策副使楊承和充深冀行營都監押壬午出內庫錢
五萬貫以助軍乙酉以幽州都知兵馬使朱克融檢校
右散騎常侍幽州盧龍軍節度使其拘囚張宏靖殺害
府僚之罪一切釋放時朝議以克融能保全宏靖王廷
湊殺害宏正可赦燕而誅趙故有是詔

已丑陳楚及朱克融戰於清源

之敗是歲天下戶計二百三十七萬五千八百五十口一千五百七十六萬二千四百三十二元不進戶軍州不在此內

二年春正月癸巳朔以用兵罷元會乙未以夔州刺史王承弁爲安南都護本管經畧招討使丁酉朱克融陷滄州弓高縣賊攻下博兼邀餉道車六百乘而去庚子魏博兵自潰於南宮縣戊申

新書
癸卯

魏博牙將史憲誠奪

師田布伏劍而卒己酉以魏博中軍先鋒兵馬使史憲誠檢校工部尙書兼魏州長史魏博節度使是日大風霾庚戌以德州刺史王日簡爲滄州刺史橫海軍節度

滄德棣觀察等使以代叔良王子貶叔良歸州刺史以
獻計誅幽鎮無功而兵敗喪所持旌節也甲寅以工部
尚書判度支崔俊檢校禮部尚書兼鳳翔尹鳳翔隴右
節度使以鴻臚卿兼御史大夫張平叔判度支復以弓
高縣爲景州青州奏海凍二百里乙卯以前鳳翔節度
使李遜爲刑部尚書己未刑部尚書李遜卒庚申以充
沂密觀察使曹華爲節度使以天德軍防禦使李進誠
爲靈州刺史朔方靈鹽定遠城節度使以晉州刺史李
岫爲豐州刺史天德軍豐州東西受降城都防禦使內
出繒帛八萬匹以助軍權停嶺南黔中今年選補二月

癸亥朔甲子詔雪王廷湊仍授鎮州長史御史大夫成
德軍節度鎮冀深趙觀察等使三軍將士待之如初仍
令兵部侍郎韓愈往彼宣諭以前吉州刺史張宏靖爲
撫州刺史宏靖初貶官尙在幽州拘留半歲克融受節
始得還故有是命丙寅以前成德軍節度使牛元翼檢
校工部尙書襄州刺史山南東道節度觀察臨漢監牧
等使丁卯以考功郎中知制誥李德裕爲中書舍人依
前翰林學士癸酉以鄜坊節度使韓充爲義成軍節度
使以代王承元以承元爲鄜坊節度使甲戌夜火木星
相近滄州節度使王日簡賜姓名李全畧辛巳以正議

大夫守中書侍郎同平章事武騎尉賜紫金魚袋崔植

爲刑部尙書罷知政事以工部侍郎元稹守本官同中

書門下平章事

表杜元穎爲中書侍郎

以翰林學士中書舍人李

德裕爲御史中丞司勳員外郎知制誥李紳爲中書舍

人依前翰林學士右庶子王仲周以奉使緩命貶台州

刺史癸未以深冀行營諸軍節度忠武軍節度使李光

顏爲滄州刺史橫海軍節度使兼忠武軍節度深冀行

營並如故以橫海軍節度使李全畧爲德州刺史德棣

節度使丙戌以兵部郎中知制誥馮宿檢校左庶子山

南東道節度副使權知襄州軍府事以牛元翼在深州

重圍故也丁亥以河東節度使司空門下侍郎同平章
事裴度守司徒同平章事東都留守判東都尙書省事
都畿汝防禦使太微宮等使以前靈武節度使李聽爲
太原尹北都留守河東節度使戊子昭義軍節度使劉
悟四其監軍使劉承偕
三月壬辰朔詔曰武班之中淹滯頗久又諸薦送大將
或隨節度使歸朝自今已後宜令神策六軍軍使及南
衙常參武官各具歷任送中書門下素立大功及有才
器者量加獎擢常參官依月限改轉諸道軍府帶監察
已上官者限三周年卽與改轉軍士死王事者三周年
內不得停衣糧先於留州留使錢內每貫割二百文助

軍今後不用抽取上於馭軍之道未得其要常云宜姑
息戎臣故卽位之初領府庫頒賞之長行所獲人至鉅
萬非時賜與不可勝紀故軍旅益驕法令益弛戰則不
克國祚日危洎頒此詔方鎮多以大將文符鬻之富賈
曲爲論奏以取朝秩者疊委於中書矣名臣扼腕無如
之何癸巳以兵部尙書蕭俛爲太子少保以前山南東
道節度使李逢吉爲兵部尙書壬寅左驍衛上將軍張
奉國卒以鴻臚卿判度支張平叔爲戶部侍郎充職平
叔以曲承恩顧上疏請官自賣鹽可以富國強兵陳利
害十八條詔下其疏令公卿詳議中書舍人韋處厚隨

條詰難固言不可事遂不行朱克融王廷湊合兵攻深
州不解裴度以書諭之克融還鎮廷湊攻城亦緩乃並
加檢校工部尚書戊申裴度來朝對於麟德殿伏奏龍
墀因敘河北用兵嗚咽流涕上改容慰勞之壬子以新
授東都留守裴度爲揚州長史淮南節度使癸丑新書
乙巳
徐州節度使崔羣爲其副使王智興所逐智興自專軍
務甲寅以右僕射韓臯爲左僕射以前淮南節度使李
夷簡爲右僕射前東都留守李絳復拜舊官丙辰守司
徒裴度正衙受冊訖謁太廟赴尚書省上宰臣百僚皆
送丁巳以尚書左丞崔從檢校禮部尚書鄜州刺史鄜

坊節度使以代王承元以承元爲鳳翔尹鳳翔隴右節度使戊午司徒裴度復入中書知政事以中書侍郎同平章事王播檢校右僕射兼揚州長史淮南節度使依前兼諸道鹽鐵轉運使以鳳翔節度使崔俊爲河南尹牛元翼率十餘騎突圍出深州來朝深州大將臧平等一百八十人皆爲王廷湊所殺

新書在四月壬戌

己未以武寧

軍節度副使王智興檢校工部尙書兼徐州刺史武寧軍節度使以德棣節度使李全畧復爲滄州節度使仍合滄景德棣爲一鎮李光顏還鎮許州夏四月辛酉朔日有食之甲子左僕射韓臯赴省上中使賜酒饌宰臣

百僚送一如近式雲陽縣角觝力人張莅負羽林官騎

康憲錢憲往徵之莅乘醉打

刑法志作拉

憲將殞憲男買德

年十四持木錡擊莅首破三日而卒刑部奏覆敕曰買德尙在童年能知子道雖殺人當死爲父可哀若從沈命之科恐失原情之意可減死罪一等忻州刺史李賁守博野王廷湊攻之不下其李賁所領兵宜割屬右神策以賁爲軍使仍以忻州軍爲名庚辰桂管觀察使杜式方卒癸未以武寧軍節度使崔羣爲祕書監分司東都翰林侍講學士韋處厚路隨進所撰六經法言二十卷賜錦綵二百匹銀器二百事處厚改中書舍人隨改

諫議大夫並賜金紫丁亥以祕書監嚴譽為桂管觀察

使是夜東北有流星光彩燭地殷殷有聲出天市垣至

郎位減五月辛卯朔以德州刺史李景儉

案景儉元年十二月貶楚

州刺史未嘗為德州又案景儉傳景儉初貶漳州元稹為相改楚州諫官論之稹懼物議追還授少府少監亦未嘗為諫議大夫疑非是為諫議大夫

王寅邕州刺史李元宗叛奔於黃洞蠻

癸丑太

子少傳嚴綬卒戊午幽州朱克融上表進馬萬匹羊十

萬口先請其價賞軍隴山有異獸如猴腰尾皆長毛青

赤而猛驚見蕃人則躍而食之遇漢人則否六月庚申

朔甲子司徒同平章事裴度守左僕射工部侍郎同平

章事元稹為同州刺史長春宮使以正議大夫守兵部

尚書輕車都尉李逢吉爲門下侍郎同中書門下平章
事乙丑大風震電墜太廟鴟吻霹御史臺樹丁卯以易
州刺史柳公濟爲定州刺史義武軍節度使壬申諫官
論責裴度太重元稹太輕乃追稹制書削長春宮使癸酉

吐蕃寇靈州鹽州刺史趙旻敗之

戊寅以前右僕射李夷簡爲太子少

保分司東都戊子復置邕管以安南副使崔結爲邕管

經畧使秋七月己丑朔丙申宋王結薨廢朝戊戌汴州

軍亂

宿直將李臣則

逐節度使李愿立牙將李弁爲留後

新書在六

月癸亥

好時縣山水漂溺居人三百家陳許蔡等州水壬

寅出中書舍人白居易爲杭州刺史乙巳詔南北省五

品已上官議討李芥丙午貶李愿爲隨州刺史以鄭滑
節度使韓充爲汴州刺史宣武軍節度汴宋亳穎觀察
等使鄭滑如故以宣武軍押衙李芥爲右金吾衛將軍
丁未內出綾絹五十萬匹付度支以供軍用陳許水災
賑粟五萬石

戊申李芥陷宋州

己酉中使楊再昌使鎮州王廷

湊奏奉詔取牛元翼家族請至秋末發遣其田宏正骸
骨尋訪不知所在辛亥以贈司徒忠烈公李愬子源爲
諫議大夫賜緋魚袋乙卯敕員外郎知制誥二年後轉
郎中又二年後轉前行郎中又一年卽正除諫議大夫
知同前郎中給事中並翰林學士別宣知者不在此限

以前義武軍節度使陳楚爲東都留守判東都尙書省

事東畿汝防禦使故事東都留守罕用武臣今用楚以

李弁擾汴宋故也

丙辰充鄆節度使曹華及李弁戰於宋州敗之丁巳忠武軍節度使李光

顏又敗之於尉氏

八月己未朔以絳州刺史崔宏禮爲河南尹

兼東畿防禦副使給事中韋穎以宏禮望輕封還詔書

上遣中使諭之乃下詔陳許李光顏將兵收汴州戊辰

以左僕射韓臯爲東都留守判東都尙書省事東畿汝

防禦使以東都留守陳楚爲河陽懷節度使

壬申宣武軍節度使

韓充敗李弁于郭橋

癸酉韓充奏今月六日發兵入汴州界營於

千塔丙子汴州監軍使姚文壽與兵馬使李質同謀斬

李芥及其黨薛志忠秦鄰等丁丑韓充入汴州以前東
都留守李絳爲華州刺史潼關防禦鎮國軍使浙東處
州大水溺居民以充海沂密節度使曹華爲滑州刺史
義成軍節度鄭滑潁觀察等使以宋州刺史高承簡爲
兗州刺史充海沂密節度使以汴州防城兵馬使李質
爲右金吾衛將軍潁州隸鄭滑節度使鹽鐵轉運使王
播進開潁口圖癸未詔遷汴宋鄭三州戰亡者稟其家三歲九月戊子朔浙
西大將王國清謀叛觀察使竇易直討平之同惡二百
餘人並誅之韓充送李芥男道源道樞道瀾等三人斬
於西市芥妻馬氏小男道本女汴娘配於掖庭王子壬子

上下字
有一焉

太子少師李夷簡卒贈太子太保癸卯以前河

陽節度使郭釗爲河中尹河中絳隰節度使御史中丞

李德裕爲潤州刺史兼御史大夫浙西都團練觀察處

置等使以代寶易直以易直爲吏部侍郎加晉州刺史

李寰爲晉慈都團練觀察使乙巳敕團練防禦州置判

官一員其副使推巡並停辛亥以吏部侍郎柳公綽爲

御史大夫先有詔廣芙蓉苑南面居人廬舍墳墓並移

之羣情駭擾癸丑降敕罷之德州軍亂害刺史王稷盡

剽其家財奴僕

新書
丙申

丁巳以萬州刺史李元喜爲安南

都護陰山府沙陀突厥兵馬使朱邪執宜來朝貢賜官

誥錦綵銀器冬十月戊午朔壬戌前河中晉絳慈隰節
度使開府儀同三司守司徒中書令河中尹上柱國許
國公韓宏可守司徒兼中書令甲子夜月掩牽牛中星
戊辰興元節度使烏重胤來朝移授天平軍節度使已
卯以工部侍郎鄭權爲工部尙書以前華州刺史許季
同爲工部侍郎是日上由複道幸咸陽止於善因佛寺
施僧錢百萬咸陽令絹百匹閏月戊子朔入迴鶻使金
吾大將軍胡証副使光祿卿李憲婚禮使衛尉卿李銳
副使宗正少卿李子鴻等送太和公主自蕃中迴庚寅
以吏部尙書鄭綱爲太子少傅以太常卿趙宗儒爲吏

部尙書韋綬爲興元尹山南西道節度使壬辰右驍衛
大將軍韓公武卒廢朝以戶部尙書楊於陵爲太常卿
丙申迴鶻可汗遣使獻國信四牀女口六人葛祿口四
人已亥敕翰林侍講學士諫議大夫路隨中書舍人韋
處厚兼充史館修撰憲宗實錄仍更日入史館實錄未
成且許不入內署仍放朝參甲寅詔江淮諸州旱損頗
多所在米價不免踊貴眷言疲困須議優矜宜委淮南
浙西東宣歙江西福建等道觀察使各於當道有水旱
處取常平義倉斛斗據時估減半價出糶以惠貧民丙
辰以太子賓客令狐楚爲陝虢觀察使十一月丁巳朔

丁卯尚書左丞庾承宣爲陝號觀察使令狐楚復爲太子賓客分司東都楚已至陝州視事一日追改之庚午命景王率禁軍五百騎侍從皇太后幸華清宮又幸石甕寺辛未以前安南都護桂仲武爲邕管經畧使癸酉上幸華清宮迎太后巡狩於驪山下卽日馳還太后翼日方還丙子集王緡薨庚辰上與內官擊鞠禁中有內官欵然墜馬如物所擊上恐罷鞠升殿遽足不能履地風眩就牀自是外不聞上起居者三日是夜月近房十二月丁亥朔詔五坊鷹隼竝解放獵具皆毀之庚寅宰臣李逢吉率百僚至延英門請見上不許中外

下屬缺文與

度等三上疏請立皇太子是夜司徒中書令韓宏卒辛卯上於紫宸殿御大繩牀見百官李逢吉奏景王成長請立爲皇太子左僕射裴度又極言之癸巳詔景王爲皇太子淮南奏和州饑烏江百姓殺縣令以取官米甲午內出絹二百匹賑兩市癘殘窮者乙未兩軍容內司公主戚屬之家竝以上疾痊平諸寺爲僧齋仍敕在京諸司疏放繫囚丙午上御宣政殿冊皇太子受冊畢百僚謁太子於東宮太子舉簾執笏答拜宮僚拜則受之丁未戶部侍郎判度支張平叔貶通州刺史是夜月掩左角己酉以前天平軍節度使馬總檢校左僕射守戶

部尙書庚戌以吏部侍郎竇易直爲戶部侍郎判度支

癸丑以太子冊禮畢宣制赦囚徒

賜文武常參及州府長官子爲父後者勲

兩轉宗子支親一轉

以前黔中觀察使崔元畧爲鄂岳蘄黃安觀

察使太子賓客孟簡卒乙卯以前陝虢觀察使衛中行爲尙書右丞是冬十月頻雪其後恒燠水不冰凍草木萌發如正二月之候

三年春正月丁巳朔上以疾不受朝賀是日大風昏翳竟日嗣郢王佐宜於崖州安置坐妄傳禁中語也敕不得買新羅人爲奴婢已在中國者卽放歸其國禮部侍郎王起奏當司所試貢舉人試訖申送中書候覆訖下

當司然後大字放膀從之三月天平軍監軍使奏節度使烏重胤病牙將王贇割股肉以療河陽節度使陳楚奏移使府於三城未有門戟欲移懷州門戟於河陽從之諫議大夫殷侑奏禮部貢舉請置三傳三史科從之戶部尚書崔倭卒三月丁巳宰臣百僚賜宴於曲江亭敕應御服及器用在淮南兩浙宣歙諸道合供進者并端午誕節常例進獻者一切權停其鷹犬之類除備蒐狩外並令解放壬戌以御史中丞牛僧孺爲戶部侍郎同中書門下平章事日晡晚後有賊入通化門鬪死者一人傷者六人賜宣徽院供奉官錢自一百二十貫文已下有差癸亥

淮南浙東西江南宣歙早遣使宣撫理繫囚察官吏表五月山南西道

奏移成州於寶井堡山南東道節度使牛元翼卒祕書

少監李隨奏請造當司圖書印一面從之壬申京師雨雹○五行志

無六月宰相監修國史杜元穎奏史官沈傳師除鎮湖

南其本分修史便令將赴本任修撰從之敕京兆尹御

史大夫韓愈宜放臺參後不得為例秋七月國子祭酒

韋乾慶卒丙寅黃洞蠻陷欽州八月鄭滑節度使曹華卒檢校右

僕射戶部尚書馬總卒興元節度使韋綬卒表丁卯裴度守司空

山南西道上由複道幸興慶宮至通化門賜持盂僧絹

二百匹因幸五坊賜從官金銀鋌有差九月壬子朔日有食之

澤潞節度使劉悟加同平章事賜宰臣百僚重九宴於
曲江亭南詔王邱伋進金碧文絲十有六品冬十月以
京兆尹韓愈爲兵部侍郎以御史中丞李紳爲江西觀
察使宰相李逢吉與李紳不協紳有時望恐用爲相及
紳爲中丞乃除韓愈爲京兆尹兼御史大夫仍放臺參
紳性峭直屢上疏論其事遂與愈辭理往復逢吉乃兩
罷之然紳出而愈留已宰相杜元穎罷知政事表檢校禮部尚書
除成都尹劍南西川節度使龍武統軍陳楚卒以兵
部侍郎韓愈爲吏部侍郎新除江西觀察使李紳爲戶
部侍郎紳旣罷除江西上令中使就第賜玉帶紳因除

敘泣而請留中使具奏故與愈俱改官召翰林學士龐
嚴對因賜金紫內園使公廨本錢一萬貫軍器使三千
貫杜元穎赴鎮蜀上御安福門餞因賜皇城留守及金
吾衛率等帛有差表庚寅牛僧孺爲中書侍郎○辛卯黃洞蠻寇安南十一月上
御通化門觀作毗沙門神因賜絹五百匹停浙東貢甜
菜海蚶十二月浙西觀察使李德裕奏去管內淫祠一
千一十五所

四年春正月辛亥朔上御殿受朝如常儀

降死罪以下減流人一歲

賜文武官及宗子賀正使階勲爵詔百官言事

上餌金石之藥處士張臯上疏

切諫上悅召之求臯不獲澤潞判官賈直言新授諫議

大夫劉悟上表乞留從之禮部尙書致仕孔幾卒辛未
上大漸詔皇太子監國壬申上崩於寢殿時年三十羣
臣上諡曰睿聖文惠孝皇帝廟號穆宗十一月庚申葬
於光陵

史臣曰臣觀五運之推遷百王之隆替亦無常治亦無
常亂在人而已匪降自天當軒黃御宇之秋則百年無
事及商辛握圖之日則四海橫流昔章武皇帝痛國命
之不行惜朝綱之將墜乃求賢俊總覽英雄果能扼大
盜之喉制姦臣之命五十載已終之士復入提封百萬
戶受弊之吐重蘇景化元和之政幾致昇平鳴梟方革

於好音龍鼎俄傷於短祚苟或時有平勃之佐繼以文
景之才則廷湊克融自縮螳螂之臂智與李芥敢萌狗
鼠之謀強盜寧窺孟賁之金餓隸不拾嬰兒之餌觀夫
孱主可謂痛心不知創業之艱難不恤黎元之疾苦謂
威權在手可以力制萬方謂旒冕在躬可以坐馳九有
曾不知聚則萬乘散則獨夫朝作股肱暮爲讐敵仲長
子所謂至於運徙勢去獨不覺悟者豈非富貴生不仁
沈溺致愚疾存亡以之迭代治亂從此周復誠哉是言
也

贊曰惠皇不令敗度亂政驕僻偶全實賴遺慶皇皇上

唐書卷第十六
帝爲民立正此何人哉遽主鼎命

唐書卷第十六